

09 JUL 2003

Multaqa-Globalisasi/I

WASPADA DENGAN AGENDA GLOBALISASI - CENDEKIAWAN PAKISTAN

Oleh: Ahmad Zukiman Zain

PUTRAJAYA, 9 Julai (Bernama) -- Seorang cendekiawan Pakistan hari ini mengingatkan mengenai bahaya globalisasi yang mungkin menjadi agenda negara-negara besar menguasai negara-negara lemah.

Rektor Universiti Islam Antarabangsa Islamabad Khalil-ur-Rehman Khan berkata globalisasi membawa persoalan tentang bagaimana negara-negara kecil dapat menjaga kepentingan mereka terutamanya dalam sektor ekonomi.

"Apabila tiada halangan tarif, bagaimana kami dapat melindungi industri-industri kecil kami yang baru hendak berkembang," katanya kepada Bernama di sini.

Khalil berada di sini untuk menyertai Multaqa Ulama Sedunia anjuran Jabatan Perdana Menteri di Hotel Marriott Putrajaya yang bermula esok.

Multaqa tiga hari itu, yang akan dirasmikan Perdana Menteri Datuk Seri Dr Mahathir Mohamad, antara lain akan membincangkan mengenai cabaran-cabaran umat Islam dalam menghadapi era globalisasi.

Bekas hakim Mahkamah Agung Pakistan itu berkata perlunya usaha bagi mewujudkan kesedaran mengenai syarat-syarat regim Pertubuhan Perdagangan Dunia (WTO).

Beliau berkata tahun lepas, universiti itu memperkenalkan kursus-kursus yang dirangka khusus untuk memenuhi permintaan era globalisasi.

Menurutnya beliau akan mengambil kesempatan daripada penganjuran multaqa itu untuk menggalakkan negara-negara Islam menghantar para pelajar dan birokrat mereka mengikuti kursus berkenaan di universiti itu.

"Kami mempunyai kursus-kursus jangka panjang dan jangka pendek dan ia (yurannya) bukanlah mahal," katanya.

Mengenai multaqa itu, Khalil berkata penganjurannya adalah tepat pada masanya dan berharap cadangan-cadangan yang dikemukakan akan diluluskan dan dilaksanakan oleh negara-negara Islam.

Beliau menjangka Dr Mahathir akan menggariskan rancangan bagi negara-negara Islam dalam ucapan perasmiannya esok.

"Dr Mahathir dihormati oleh negara-negara Islam di atas ketegasan dan keberaniannya melaksanakan program ekonomi ... lihatlah hasil dasar-dasar itu di Malaysia," kata Khalil yang pernah mengunjungi Malaysia pada 1999.

-- BERNAMA

AZZ AZZ NAK